

今體詩鈔

冊三



七言今體詩鈔卷第四

劉文房十一首

登餘干古縣城

孤城上與白雲齊，萬古荒涼楚水西。  
官舍已空秋草沒，女牆猶在夜烏啼。  
平沙渺渺迷人遠，落日亭亭向客低。  
飛鳥不知陵谷變，朝來暮去弋陽谿。

過賈誼宅

三年謫宦此棲遲，萬古惟留楚客悲。  
秋草獨尋人去後，寒林空見日斜時。  
漢文有道恩猶薄，湘水無情弔豈知。  
寂寂江山搖落處，憐君何事到天涯。

將赴嶺外留題蕭寺遠公院

自注寺即梁朝蕭內史剏

竹房遙閉上方幽，苔徑蒼蒼訪昔游。  
內史舊山空日暮，南朝古木向人秋。  
天香月色同僧室，葉落猿啼傍

客舟此去播遷明主意白雲何事欲相留

獻淮南軍節度李相公

大歷十一年加淮西節度使李忠臣同平章事

十四年忠臣被逐於李希烈後乃改淮西軍號曰淮南題是編詩時追改及忠臣從朱泚為逆

文房不及知矣

建牙吹角不聞喧三十登壇衆所尊家散萬金酬士

死身留一劍答君恩漁陽老將多迴席魯國諸生半

在門白馬翻翻春草綠邵陵西去獵平原

文房刺隨州乃淮西

屬

送李錄事兄歸襄陽

十年多難與君同幾處移家逐轉蓬白首相逢征戰

後青春已過亂離中行人杳杳看西日歸馬蕭蕭向

北風漢水楚雲千萬里天涯此別恨無窮

送耿拾遺歸上都

寶應元年以京兆府為上都此為睦州司馬時作文房由

潘州貶同故云窮海別離也  
潘州今高州陸州今巖州

若爲天畔獨思秦，對水看山欲暮春。  
窮海別離無限路，隔河征戰幾歸人。  
長安萬里傳雙淚，建德千峯寄一身。  
想到郵亭愁駐馬，不堪西望見風塵。

送柳使君赴袁州

宜陽出守新恩至

袁州宜春郡東晉時以避諱稱宜陽

京口因家始願

違五柳閉門高士去，三苗按節遠人歸。  
月明江路聞猿斷，花暗山城見吏稀。  
唯有郡齋窗裏岫，朝朝空對謝元暉。

送陸澧倉曹西上

長安此去欲何依，先達誰當薦陸機。  
日下鳳翔雙闕迥，雪中人去二陵稀。  
舟從故里難移棹，家在寒塘獨掩扉。  
臨水自傷流落久，贈君空有淚霑衣。

青谿口送人歸岳州

洞庭何處鴈南飛。江菼蒼蒼客去稀。帆帶夕陽千里沒。天連秋水一人歸。黃花裊露開沙岸。白鳥銜魚上釣磯。岐路相逢無可贈。老年空有淚霑衣。

江州重別薛六柳八二員外

生涯豈料承恩詔。世事空知學醉歌。江上月明秋鴈過。淮南木落楚山多。寄身且喜滄洲近。顧影無如白髮何。今日龍鍾人共棄。愧君猶遣慎風波。

使次安陸寄友人

肅代之時江淮間有劉展袁  
勰之亂木陵以東光黃舒廬

蓋苦兵擾不識春和矣其  
西則差安靜故有第四句

新年草色遠萋萋。久客將歸問路蹊。暮雨不知湏口處。春風只到木陵西。孤城盡日空花落。三戶無人自鳥啼。君在江南相憶否。門前五柳幾枝低。

自夏口至鸚鵡洲望岳陽寄阮中丞

汀洲無浪復無煙。楚客相思亦渺然。漢口夕陽斜度  
鳥。洞庭秋水遠連天。孤城背嶺寒吹角。獨樹臨江夜  
泊船。賈誼上書憂漢室。長沙謫去古今憐。

韋應物二首

自鞏洛舟行入黃河卽事寄府縣寮友

夾水蒼山路向東。東南山豁大河通。寒樹依微遠天  
外。夕陽明滅亂流中。孤村幾歲臨伊岸。一鴈初晴下  
朔風。爲報洛橋遊宦侶。扁舟不繫與心同。

寄李儋元錫

去年花裏逢君別。今日花開又一年。世事茫茫難自  
料。春愁黯黯獨成眠。身多疾病思田里。邑有流亡愧  
俸錢。聞道欲來相問訊。西樓望月幾回圓。

韓君平三首

送鄭員外

風流不減杜陵時。五十爲郎未是遲。孺子亦知天下士。樂人爭唱卷中詩。身齊吏部還多醉。心顧尚書自有期。要路眼看知己在。不應窮巷久低眉。

唐人多干乞之辭而

此等語尤猥陋

送冷朝陽還上元

青絲纜引木蘭船。名遂身歸拜慶年。落日澄江烏榜外。秋風疏柳白門前。橋通小市家林近。山帶平蕪野寺連。別後剛逢寒食節。共誰攜手在東田。

送客歸江州

東歸復得采真游。江水迎君日夜流。客舍不離青雀舫。人家多住白蘋洲。風吹山帶遙知雨。露溼荷裳已



報秋聞道泉明居止近。藍輿相訪慰淹留。

李君虞一首

鹽州過五原至飲馬泉

綠楊著水草含煙。舊是胡兒飲馬泉。幾處吹笳明月夜。何人倚劍白雲天。從來凍合關山道。今日分流漢使前。莫遣行人照容鬢。恐驚憔悴入新年。

皇甫茂政四首

秋日東郊

閒看秋水心無事。坐對寒松手自栽。廬岳高僧留偈別。茅山道士寄書來。燕知社日辭巢去。菊爲重陽冒雨開。淺薄將何稱獻納。臨岐終日獨遲回。

送李錄事赴饒州

北人南去雪紛紛。鴈叫沙汀不可聞。積水長天隨遠

客荒城極浦足寒雲。山從建業千峯出。江到潯陽九派分。借問督郵纔弱冠。府中年少不如君。

同溫丹徒登萬歲樓

高樓獨上思依依。極浦遙山合翠微。江客不堪頻北望。塞鴻何事復南飛。丹陽古渡寒煙積。瓜步空洲遠樹稀。聞道王師猶轉戰。誰能談笑解重圍。

春思

鶯啼燕語報新年。馬邑龍堆路幾千。家住層城鄰漢苑。心隨明月到胡天。機中錦字論長恨。樓上花枝笑獨眠。爲問元戎寶車騎。何時返旆勒燕然。

盧允言四首

長安春望

東風吹雨過青山。卻望千門草色閒。家在夢中何日

到春來江上幾人還。川原繚繞浮雲外，宮闕參差落照閒。誰念爲儒逢世難，獨將衰鬢客秦關。

晚次鄂州

雲開遠見漢陽城，猶是孤帆一日程。估客晝眠知浪靜，舟人夜語覺潮生。三湘愁鬢逢秋色，萬里歸心對月明。舊業已隨征戰盡，更堪江上鼓鼙聲。

至德中途中書事卻寄李澗

亂離無處不傷情，況復看碑對古城。路遶寒山人獨去，月臨秋水鴈空驚。顏衰重喜歸鄉國，身賤多慚問姓名。今日主人還共醉，應憐世上有儒生。

秋日過獨孤郊居

閒園遇水到郊居，共引家僮拾野蔬。高樹夕陽連古巷，菊花藜葉滿荒渠。秋山近處行過寺，夜雨寒時起

讀書帝里諸親別來久。豈知王粲舊樵漁。

李從一二首

贈別嚴士元

春風倚棹闔廬城。水國春寒陰復晴。細雨溼衣看不見。閒花落地聽無聲。日斜江上孤帆影。草綠湖南萬里情。東道若逢相識問。青袍今已誤儒生。

自蘇臺至望亭驛人家盡空春物增思悵然有

作因寄從弟紆

此殆上元中劉展亂後之詩

南浦菰蔣覆白蘋。東吳黎庶逐黃巾。野棠自發空流水。江燕初飛不見人。遠樹依依如送客。平田渺渺獨傷神。那堪回首長洲苑。烽火年年報虜塵。

李端二首

宿淮浦憶司空文明

愁心一倍長離憂。夜思千重戀舊游。秦地故人成遠  
夢。楚天涼雨在孤舟。諸谿近海潮皆應。獨樹邊淮葉  
盡流。別恨轉深何處寫。前程惟有一登樓。

贈郭駟馬

青春都尉最風流。二十功成便拜侯。金距鬪雞過上  
苑。玉鞭騎馬出長楸。熏香荀令偏憐少。傅粉何郎不  
解愁。日暮吹簫楊柳陌。路人遙指鳳皇樓。

劉夢得五首

西塞山懷古

王濬樓船下益州。金陵王氣黯然收。千尋鐵鎖沈江  
底。一片降帆出石頭。人世幾回傷往事。山形依舊枕  
寒流。今逢四海爲家日。故壘蕭蕭蘆荻秋。

松滋渡望峽中

渡頭輕雨灑寒梅。雲際溶溶雪水來。夢渚草長迷楚望，夷陵土黑有秦灰。巴人淚應猿聲落，蜀客船從鳥道回。十二碧峯何處所，永安宮外是荒臺。

送浙西李僕射相公赴鎮

文宗太初八年李衛公以舊相為鎮海節

度使時鎮海治潤州舊稱浙西衛公長慶寶歷間為浙西觀察使

建節東行是舊游。歡聲喜氣滿吳州。郡人重得黃丞相，稚子爭迎郭細侯。詔下初辭溫室樹，夢中先到景陽樓。自憐不識平津閣，遙望旌旗汝水頭。

同樂天送河南馮尹學士之任

馮宿長慶中以左散騎常侍兼

集賢殿學士拜河南尹

可憐五馬風流地，暫輟金貂侍從才。閣上掩書劉向去，門前修刺孔融來。嶠陵路盡寒無雨，洛水橋長晝起雷。卻羨府中常棣好，先於城外百花開。  
宿弟定與宿齊名見

宿傳此應酬  
詩卻有氣色

哭呂衡州

呂溫以知雜御史貶通州  
刺史徙衡州卒年四十

一夜霜風凋玉芝，蒼生絕望士林悲。  
空懷濟世安人略，不見男婚女嫁時。  
遺草一函歸太史，旅墳三尺近要離。  
朔方徙歲行將晚，欲爲君刊第二碑。  
夢得此時在貶謫故碑者故擬北還雖呂已有碑猶欲爲更撰也

楊景山一首

送人

此必舊臣之子，失志而投河北藩鎮者，故不出其名。衡州乃魏博管內，非中朝士大夫往來任宦之路。過衡州則幾如異域矣。此其意最悽愴處。

憶昔征南府內游，君家東閣最淹留。  
縱橫連句長侵夜，次第看花直到秋。  
論舊舉楛先下淚，傷離臨水更登樓。  
相思前路幾回首，滿眼青山過衛州。

柳子厚三首

登柳州城樓寄漳汀封連四州刺史

城上高樓接大荒，海天愁思正茫茫。  
驚風亂颭芙蓉水，密雨斜侵薜荔牆。  
嶺樹重遮千里目，江流曲似九迴腸。  
共來百粵文身地，猶自音書滯一鄉。

別舍弟宗一

零落殘魂倍黯然，雙垂別淚越江邊。  
一身去國六千里，萬死投荒十二年。  
桂嶺瘴來雲似墨，洞庭春盡水如天。  
欲知此後相思夢，長在荆門郢樹煙。

上而用煙字  
不免湊韻

柳州城西北隅種甘樹

手種黃甘二百株，春來新葉徧城隅。  
方同楚客憐皇樹，不學荊州利木奴。  
幾歲花開聞噴雪，何人摘實見垂珠。  
若教坐待成林日，滋味還堪養老夫。

結句自傷  
遷謫之久



蕊見甘之成林也而託詞反平緩故佳

秦公緒一首

題茅山李尊師山居

此當卽李含光顏魯公所爲書碑者也元宗奉爲師

故詩云天師

天師百歲少如童。不到山中竟不逢。洗藥每臨新瀑水。步虛時上最高峯。籬閒五月留殘雪。座右千年蔭老松。此去人寰知遠近。回看雲壑一重重。

王仲初一首

李處士故居

霧濃煙重草萋萋。樹映闌干柳拂隄。一院落花無客醉。半牕殘月有鷺啼。芳筵想像情難盡。故樹荒涼路欲迷。惆悵羸驂來往慣。每經門巷亦長嘶。

張文昌一首

寄和州劉使君

別離已久猶爲郡。閒向春風倒酒餅。送客將過沙口  
堰。看花多上水心亭。曉來江氣連城白。雨後山光滿  
郭青。到此詩情應更遠。醉中高詠有誰聽。

寶遺直一首

夏夜宿表兄宅話舊

夜合花開香滿庭。夜深微雨醉初醒。遠書珍重何曾  
達。舊事淒涼不可聽。去日兒童皆長大。昔年親友半  
凋零。明朝又是孤舟別。愁見河橋酒幔青。

白樂天十首

西湖留別

征途行色慘風煙。祖帳離聲咽管弦。翠黛不須留五  
馬。皇恩只許往三年。綠藤陰下鋪歌席。紅藕花中泊

妓船處處回頭盡堪戀就中難別是湖邊

錢塘湖春行

孤山寺北賈亭西水面初平雲腳低幾處早鶯爭暖  
樹誰家新燕啄春泥亂花漸欲迷人眼淺草纔能沒  
馬蹄最愛湖東行不足綠楊陰裏白沙隄

夜歸

半醉閒行湖岸東馬鞭敲鐙響瓊瑰萬株松樹青山  
上十里沙隄明月中樓角漸移當路影潮頭欲過滿  
江風歸來未放笙歌散畫戟門開熾燭紅

西湖晚歸回望孤山寺贈諸客

柳湖松島蓮花寺晚動歸橈出道場盧橘子低山雨  
重櫻欄葉戰水風涼煙波淡蕩搖空碧樓殿參差倚  
夕陽到岸請君回首望蓬萊宮在水中央

非至西湖  
不知此寫

景之  
工

江樓夕望招客

海天東望夕茫茫。山勢川形闕復長。燈火萬家城四  
畔。星河一道水中央。風吹古木晴天雨。月照平沙夏  
夜霜。能就江樓銷暑否。比君茅屋較清涼。  
白傅俚俗  
不可耐其  
佳處自  
不相掩

庾樓曉望

獨憑朱檻立凌晨。山色初明水色新。竹霧曉籠銜嶺  
月。蘋風暖送過江春。子城陰處猶殘雪。衙鼓聲中未  
有塵。三百年來庾樓上。曾經多少望鄉人。

杭州春望

望海樓明照曙霞。護江隄白踏晴沙。濤聲夜入伍員  
廟。柳色春藏蘇小家。紅杏織綾誇柿蒂。青旗酤酒趁

梨花誰開湖寺西南路草綠裙腰一道斜

與夢得沽酒閒飲且約後期

少時猶不憂生計老後誰能惜酒錢共把十千沽一  
斗相看七十欠三年閑徵雅令窮經史醉聽清吟勝  
管弦更待菊黃家醞熟共君一醉一陶然

寄殷協律

五載優游同過日一朝消散似浮雲琴書酒伴皆拋  
我雪月花時最憶君幾度聽雞歌白日亦曾騎馬入  
紅裙自注予在杭州日有歌云聽唱黃雞  
與白日又有詩云著紅騎馬是何人吳娘暮雨  
蕭蕭曲自注江南更不聞自注江南吳二娘曲詞  
云暮雨蕭蕭郎不歸

欲與元八卜鄰先有是贈

平生心迹最相親欲隱牆東不爲身明月好同三徑  
夜綠楊宜作兩家春每因暫出猶思伴豈得安居不

擇鄰何獨終身數相見子孫猶作隔牆人

元微之一首

以州宅誇於樂天

時觀察  
越州

州城迴遶拂雲堆鏡水稽山滿眼來四面常時對屏  
障一家終日在樓臺星河看向檐前落鼓角驚從地  
底迴我是玉皇香案吏謫居猶得近蓬萊

自注越地  
亦名蓬萊

七言今體詩鈔卷第四

七言今體詩鈔卷第五

李義山三十二首

漢南書事

西師萬衆幾時迴，哀痛天書近已裁。  
文吏何曾重刀筆，將軍猶自舞輪臺。  
幾時拓土成王道，從古窮兵是禍胎。  
陛下好生千萬壽，玉樓長御白雲杯。

帳下猶  
歌舞意

隨師東

東征日調萬黃金，幾竭中原買鬪心。  
軍令未聞誅馬謖，捷書惟是報孫歆。  
但須鸞鷲巢阿閣，豈假鴟鷂在泮林。  
可惜前朝元菟郡，積骸成莽陣雲深。

重有感

玉帳牙旗得上游，安危須共主君憂。  
寶融表已來關

右陶侃軍宜次石頭豈有蛟龍長失水更無鷹隼與  
高秋晝號夜哭兼幽顯早晚星關雪涕收

寫意

燕鴈迢迢隔上林高秋望斷正長吟人閒路有潼江  
險天外山惟玉壘深日向花閒留返照雲從城上結  
層陰三年已制思鄉淚更入新年恐不禁

安定城樓

迢遞高城百尺樓綠楊枝外盡汀洲賈生年少虛垂  
淚王粲春來更遠遊永憶江湖歸白髮欲回天地入  
扁舟不知腐鼠成滋味猜意鷓鴣竟未休

時義山為  
王茂元所

愛幕中必有忌之  
者故結句云爾

茂陵

漢家天馬出蒲梢首著榴花徧近郊內苑只知含鳳



觴屬車無復插雞翹。玉桃偷得憐方朔。金屋修成貯  
阿嬌。誰料蘇卿老歸國。茂陵松柏兩蕭蕭。

籌筆驛

猿鳥猶疑畏簡書。風雲常爲護儲胥。徒令上將揮神  
筆。終見降王走傳車。管樂有才終不忝。關張無命欲  
何如。他年錦里經祠廟。梁父吟成浪有餘。

隋宮

紫泉宮殿鎖煙霞。欲取蕪城作帝家。玉璽不緣歸日  
角。錦帆應是到天涯。於今腐草無螢火。終古垂楊有  
暮鴉。地下若逢陳後主。豈宜重問後庭花。

馬嵬

海外徒聞更九州。他生未卜此生休。空聞虎旅傳宵  
柝。無復雞人報曉籌。此日六軍同駐馬。當時七夕笑

牽牛如何四紀爲天子不及盧家有莫愁

曲江

前四句言天寶之禍固所謂天荒地變矣五六則言甘露之事元宗事雖可悲然其

後則變幸既誅天子反正猶可言也若今受制家奴大臣冤死至不敢言其可傷不更多耶鄭

注言秦雍有災興役厭之文宗因治曲江昆明曲江甘露兩事皆因注也故以起感

望斷平時翠輦過空聞子夜鬼悲歌金輿不返傾城色玉殿猶分下苑波死憶華亭聞唳鶴老憂王室泣銅駝天荒地變心雖折若比傷春意未多

### 九成宮

十二層城闔苑西平時避暑拂虹霓雲隨夏后雙龍尾風逐周王八駿蹄吳岳曉光連翠巘甘泉晚景上丹梯荔枝盧橘霑恩幸鸞鵲天書溼紫泥

荔枝盧橘皆夏熟切

避暑末句但謂詔求此果耳而語乃迂晦此義山之病

題道靜院院在中條山故王顏中丞所置號州

刺史捨官居此今寫真存焉

紫府丹成化鶴羣青松手植變龍文壺中別有仙家  
日嶺上猶多隱士雲獨坐遺芳成故事褰帷舊貌似  
元君自憐築室靈山下徒望朝嵐與夕曛

聖女祠

松篁臺殿薰香幃龍護瑤窗鳳掩扉無質易迷三里  
霧不寒長著五銖衣人閒定有崔羅什天上應無劉  
武威寄問釵頭雙白燕每朝珠館幾時歸

重過聖女祠

白石巖扉碧蘚滋上清淪謫得歸遲一春夢雨常飄  
瓦盡日靈風不滿旗萼綠華來無定所杜蘭香去未  
移時玉郎會此通仙籍憶向天階問紫芝

井絡

井絡天彭一掌中。漫誇天設劍爲峯。陣圖東聚夔江石。邊柝西縣雪嶺松。堪歎故君成杜宇。可能先主是真龍。將來爲報姦雄輩。莫向金牛訪舊蹤。

鄭州獻從叔舍人褒

蓬島煙霞閬苑鐘。三官牋奏附金龍。茅君奕世仙曹貴。許掾全家道氣濃。絳簡尚參黃紙案。丹鑪猶用紫泥封。不知他日華陽洞。許上經樓第幾重。

五六東餐西宿之語

意褒乃託神仙說以取貴者故以是諷之與

贈鄭協律哲

俱識孫公與謝公。二年歌哭處還同。已叨鄒馬聲華末。更共劉盧族望通。南省恩深賓館在。東山事往妓樓空。不堪歲暮相逢地。我欲西征君又東。

贈鄭讜處士

浪迹江湖白髮新。浮雲一片是吾身。寒歸山觀隨棋局。暖入江洲逐釣綸。越桂留烹張翰鱠。蜀薑供煮陸機蔬。相逢一笑憐疏放。他日扁舟有故人。  
前六句皆謂鄭吾身亦以託鄭也。未乃自指。

留贈畏之

清時無事奏明光。不遣當關報早霜。中禁詞臣尋引領。左川歸客自迴腸。郎君下筆驚鸚鵡。侍女吹笙弄鳳皇。空記大羅天上事。衆仙同日詠霓裳。  
弄鳳字用後漢吳蒼

與矯慎書

贈別前蔚州契苾使君

武宗會昌二年以蔚州刺史契苾通將蕃兵詣

武振

何年部落到陰陵。奕世勤王國史稱。夜掩牙旗千帳雪。朝飛羽騎一河冰。蕃兒襁負來青冢。狄女壺漿出

白登日晚鷓鴣泉畔獵。路人遙識邳都鷹。

唐書地理志有州調

露元年於靈夏南境以降突厥置六胡州內有契丹部落矣開元十年遷其於河南及江淮二

寄令狐學士

祕殿崔嵬拂彩霓。曹司今在殿東西。賡歌太液翻黃鵠。從獵陳倉獲碧雞。曉飲豈知金掌迥。夜吟應訝玉繩低。鈞天雖許人閒聽。閶闔門多夢自迷。

子初郊墅

看山對酒君思我。聽鼓離城我訪君。臘雪已添牆下水。齋鐘不散檻前雲。陰移竹柏濃還淡。歌雜漁樵斷更聞。亦擬村南買煙舍。子孫相約事耕耘。

哭劉蕡

上帝深宮閉九閭。巫咸不下問銜冤。廣陵別後春濤隔。溢浦書來秋雨翻。只有安仁能作詠。何曾宋玉解招魂。平生風義兼師友。不敢同君哭寢門。

過故府武威公交城舊莊感事

題減中字  
依何義門

信陵亭館接郊畿。幽象遙通晉水祠。日落高門喧燕雀。風飄大樹撼熊羆。新蒲似筆思投日。芳草如茵憶吐時。山下只今黃絹字。淚痕猶墮六州兒。

枯樹賦熊彪顧盼第

四句用  
其意

九日

曾共山翁把酒時。霜天白菊遶階墀。十年泉下無人問。九日尊前有所思。不學漢臣栽苜蓿。空教楚客詠江蓠。郎君官貴施行馬。東閣無因再得窺。

少年

外戚平羌第一功。生年二十有重封。直登宣室螭頭上。橫過甘泉豹尾中。別館覺來雲雨夢。後門歸去蕙蘭叢。灞陵夜獵隨田寶。不識寒郊自轉蓬。

富平少侯

七國三邊未到憂。十三身襲富平侯。不收金彈拋林外。卻惜銀牀在井頭。綵樹轉鐙珠錯落。繡檀迴枕玉雕鏤。當關不報侵晨客。新得佳人字莫愁。

錦瑟

錦瑟無端五十弦。一弦一柱思華年。莊生曉夢迷蝴蝶。望帝春心託杜鵑。滄海月明珠有淚。藍田日暖玉生煙。此情可待成追憶。只是當時已惘然。

無題

來是空言去絕蹤。月斜樓上五更鐘。夢爲遠別啼難



喚書被催成墨未濃蠟照半籠金翡翠麝熏微度繡芙蓉劉郎已恨蓬山遠更隔蓬山一萬重

無題

昨夜星辰昨夜風畫樓西畔桂堂東身無綵鳳雙飛翼心有靈犀一點通隔座送鉤春酒暖分曹射覆蠟鐙紅嗟余聽鼓應官去走馬蘭臺類轉蓬

杜工部蜀中離席

人生何處不離羣世路干戈惜暫分雪嶺未歸天外使松州猶駐殿前軍座中醉客延醒客江上晴雲雜雨雲美酒成都堪送老當壚仍是卓文君

二月二日

二月二日江上行東風日暖聞吹笙花鬚柳眼各無賴紫蝶黃蜂俱有情萬里憶歸元亮井三年從事亞

夫營新難莫悟游人意更作風簷夜雨聲

溫飛卿五首

經五文原

鐵馬雲雕共絕塵柳營高壓漢宮春天清殺氣屯關  
右夜半妖星照渭濱下國臥龍空寤主中原得鹿不  
由人象牀寶帳無言語從此譙周是老臣

第二句借  
用細柳營

以此武侯之營五文原在武功東望  
盤屋有漢離宮然終是湊句不佳

過陳琳墓

曾於青史見遺文今日飄蓬過此墳詞客有靈應識  
我霸才無主始憐君石麟埋沒藏春草銅雀荒涼對  
暮雲莫怪臨風倍惆悵欲將書劍學從軍

春日偶成

西園一曲豔陽歌擾擾車塵負薜蘿自欲放懷猶未

得不知經世竟如何。夜聞猛雨判花盡。寒戀重衾覺  
夢多。釣渚別來應更好。春風還爲起微波。

池塘七夕

月出西南露氣秋。綺寮河漢在鍼樓。楊家繡作鴛鴦  
幔。張氏金爲翡翠鉤。銀燭有光妨宿燕。畫屏無睡待  
牽牛。萬家砧杵三篙水。一夕橫塘是舊游。

題望苑驛

弱柳千條杏一枝。半含春雨半垂絲。景陽寒井人難  
到。長樂晨鐘鳥自知。花影至今通博望。樹名從此號  
相思。分明十二樓前月。不向西陵照盛姬。

七言今體詩鈔卷第五



七言今體詩鈔卷第六

許用晦七首

藝文志作許  
渾字用聘

題衛將軍廟

將軍名逖。陽羨人。少習詩書。學劍二十七游  
并汾閒。遇神堯皇帝。始建義旗。逖以勇藝進  
備行列。洎擒竇建德。逖時挾鎗劍前突後翼。  
太宗顧而奇之。天下既定。錄其功。拜將軍宿  
衛。以母老且病。乞歸侍殘年。辭旨哀激。詔許  
之。既而以孝敬睦閨門。以然諾居鄉里。及卒。  
邑人懷其賢。廟於荆谿之湄。以生平弓甲縣  
東西廡下。歲時祠祭。頗福其土焉。文士王敖  
撰碑辭實詳備。而國史闕書其人。因題詩於

廟壁。

虎牢關下護龍旗。挾槊彎弓馬上飛。漢業未興王霸在。秦兵纔散魯連歸。墳穿大澤埋金劍。廟枕長流挂鐵衣。欲奠忠魂何處問。葦花楓葉雨霏霏。

金陵懷古

玉樹歌殘王氣終。景陽兵合戍樓空。松楸遠近千官冢。禾黍高低六代宮。石燕拂雲晴亦雨。江豚吹浪夜還風。英雄一去豪華盡。惟有青山似洛中。  
第二句不穩貼

凌歊臺

宋祖凌歊樂未回。三千歌舞宿層臺。江潭雲盡暮山出。巴蜀雪消春水來。行殿有基荒薺合。寢園無主野

棠開。百年便作萬年計。岳畔古碑空綠苔。  
胡遜叟云

稱祖武帝稱高祖孝武稱世祖凌歊在當塗黃山上地志孝武登凌歊臺置離宮本紀亦載姑熟校獵事今於黃山西望天門兩崖中豁江水真有從巴蜀直來之勢東望牛渚是為江潭舊作湘潭字誤耳

用晦此詩大爲楊升庵詆斥謂要不免有句無章之病寢  
一聯與上二句如何接下要  
國二字亦湊用不的當此等詩  
姑以句取可耳百年句無著

### 咸陽城東樓

一上高城萬里愁。蒹葭楊柳似汀洲。  
谿雲初起日沈閣。山雨欲來風滿樓。  
鳥下綠蕪秦苑夕。蟬鳴黃葉漢宮秋。  
行人莫問當年事。故國東來渭水流。

必當是咸陽景色耶大抵用晦詩似先得句而後加題傅合者然此其病也

### 晚自朝臺津至韋隱居郊園

秋來鳧鴈下方塘。繫馬朝臺步夕陽。  
村徑遶山松葉暗。柴門臨水稻花香。  
雲連海氣琴書潤。風帶潮聲枕簟涼。  
西上磻谿萬餘里。可能垂白待文王。

### 京口閒居寄兩都親友

吳門煙月昔同游。楓葉蘆花並客舟。  
聚散有期雲北

去浮沈無計水東流。一樽酒盡青山暮。千里書回碧樹秋。何處相思不相見。鳳城宮闕楚江樓。

送蕭處士歸緱山別業

醉斜烏帽髮如絲。曾看仙人一局棋。賓館有魚爲客久。鄉書無鴈到家遲。緱山住近吹笙廟。湘水行逢鼓瑟祠。今夜月明何處宿。九疑雲盡碧參差。

杜牧之四首

九日齊安登高

江涵秋影鴈初飛。與客攜壺上翠微。塵世難逢開口笑。菊花須插滿頭歸。但將酩酊酬佳節。不用登臨歎落暉。古往今來只如此。牛山何必獨霑衣。

得替後移居雪谿館

萬家相慶喜秋成。處處樓臺歌板聲。千歲鶴歸猶有



恨一年人住豈無情夜涼谿館留僧話風定蘇潭看  
月生景物登臨閒始見願爲閒客此閒行

街西

碧池新漲浴嬌鴉分鎖長安富貴家游騎偶同人鬪  
酒名園相倚杏交花銀鞍驟裊嘶宛馬繡鞞瓊瓏走  
鈿車一曲將軍何處笛連雲芳樹日初斜

早鴈

金河秋半虜弦開

唐地理志單于大都護府  
金河縣本後魏道武所都

雲外驚

飛四散哀仙掌月明孤影過長門燈暗數聲來須知  
胡騎紛紛在豈逐春風一一迴莫厭瀟湘少人處水  
多菰米岸莓苔

薛陶臣二首

韋壽博書齋

元宴先生已白頭。不隨鷓鴣狎羣鷗。元卿謝免開三徑。平仲朝回臥一裘。醉後獨知殷甲子。病來猶作晉春秋。塵纓未濯今如此。野水無情處處流。

送靈州田尚書

此田尚書疑即通鑑會昌元年天德軍使田牟請率塞下雜虜

擊回鶻者田宏正之子也

陰風獵獵滿旌竿。白草颼颼劍戟攢。九姓羌渾隨漢

節。六州蕃部從戎鞍。

唐書迴鶻傳載鐵勒九姓之名曰藥羅葛等藥羅葛即回鶻姓

也鐵勒有渾部然非羌渾與羌連言者吐谷渾也九姓與羌殊種此因渾部致誤用耳元和郡縣志調露

元年於靈州南界置魯麗含塞依契六州以處降突厥時謂之六胡州

霜中入塞調弓

響。月下翻營玉帳寒。今日路旁誰不指。穰苴門戶慣

登壇

李德新一首

湖口送友人

中流日暮見湘煙。葦岸無窮接楚天。去鴈遠衝雲夢雪。離人獨上洞庭船。風波盡日依山轉。星漢通宵向水連。零落梅花過殘臘。故園歸去又新年。

李楚望一首

江上逢王將軍

虬鬚憔悴羽林郎。曾入甘泉侍武皇。鵬沒夜雲知御苑。馬隨春仗識天香。五湖歸去孤舟月。六國平來兩鬢霜。惟有桓伊江上笛。臥吹三弄送殘陽。

李文山一首

黃陵廟

小姑洲北浦雲邊。二女明妝共儼然。野廟向江春寂寂。古碑無字草芊芊。迴風日暮吹芳芷。落月山深哭杜鵑。猶似含顰望巡狩。九疑凝黛隔湘川。

趙承祐二首

長安秋夕

雲物淒清拂曙流，漢家宮闕動高秋。  
殘星幾點鴈橫塞，長笛一聲人倚樓。  
紫豔半開籬菊靜，紅衣落盡渚蓮愁。  
鱸魚正美不歸去，空戴南冠學楚囚。

張安客舍敘邵陵舊宴懷永州蕭使君

湖南六朝之邵

陵郡唐爲邵州題指此非淮西之邵陵縣也

邵陵臺樹碧蔥蘢

臺字誤或是春字

河漢西流宴未終，殘漏

五更傳海月，清笳三會揭天風。  
香熏舞席雲鬟綠，光射散盤蠟燭紅。  
今日卻思行樂處，兩牀絲竹水樓中。  
長安月夜與支生話故山

宅邊秋水浸苔磯，日日持竿去不歸。  
楊柳風多潮未落，蒹葭霜在鴈初飛。  
重嘶匹馬吟紅葉，卻聽疏鐘憶

翠微今夜秦城滿樓月。故人相見一霑衣。

韓致堯二首

春盡

惜春連日醉昏昏。醒後衣裳見酒痕。細水浮花歸別  
澗。斷雲含雨入孤村。人閒易得芳時恨。地迴難招白  
古魂。慚愧流鶯相厚意。清晨猶爲到西園。

亂後春日塗經野塘

世亂他鄉見落梅。野塘晴暖獨裴裒。船衝水鳥飛還  
住。袖拂楊花去又來。季重舊游多喪迹。子山新賦亦  
悲哀。眼看朝市成陵谷。始信昆明是劫灰。

殘春旅舍

旅舍殘春宿雨晴。恍然心地憶咸京。樹頭蜂抱花鬚  
落。池面魚吹柳絮行。禪伏詩魔歸靜域。酒衝愁陣出

奇兵兩梁免被塵埃汗。拂拭朝簪待眼明。

晉書輿服志進賢冠

文儒者之服三公三梁後漢書健為任永馮信公孫述連中書郎以下一梁後漢書健為任永馮信公孫述連徵命皆託青盲以避世難及聞述誅皆盥洗更視曰世適平目即清

### 吳子華二首

#### 金橋感事

太行和雪疊晴空。二月春郊尚朔風。飲馬早聞臨渭北。射雕今欲過山東。百年徒有伊川歎。五利甯無魏絳功。日暮長亭正愁絕。哀笳一曲戍煙中。

#### 題湖城縣西道中槐樹

零落欹斜此路中。盛時曾識太平風。曉迷天仗歸春苑。暮送鸞旗指洛宮。一自煙塵生薊北。更無消息幸關東。而今只有孤根在。烏啄蟲穿沒亂蓬。

明皇以前人主常幸

東都緣道置宮館當時殊苦勞費及天寶亂後追思昔時更不可得此詩盛衰之感頗為濃至但曉暮二

湊字

張儉二首

晚次湘源縣

煙郭遙聞向晚雞。水平舟靜浪聲齊。高林帶雨楊梅熟。曲岸籠雲謝豹啼。二女廟荒汀樹老。九疑山碧楚天低。湘南自古多離怨。莫動哀吟易慘悽。

洞庭阻風

空江浩蕩景蕭然。盡日菰蒲泊釣船。青草浪高二月渡。綠楊花撲一谿煙。情多莫舉傷春日。愁極兼無買酒錢。猶有漁人數家住。不成村落夕陽邊。

羅昭諫二首

綿谷迴寄蔡氏昆仲

一年兩度錦江游。前值東風後值秋。芳草有情皆礙

馬好雲無處不遮樓。山牽別恨和腸斷。水帶離聲入夢流。今日因君試回首。淡煙喬木隔綿州。

寄前宣州竇常侍

往年西謁謝元暉。尊酒留歡醉始歸。曲檻柳濃鶯未老。小園花暖蝶初飛。噴香瑞獸金三尺。舞雪佳人玉一圍。今日亂離尋不得。滿蓑風雨釣魚磯。

韋端己八首

憶昔

昔年曾向五陵游。午夜清歌月滿樓。銀燭樹前長似晝。露桃花下不知秋。西園公子名無忌。南國佳人字莫愁。今日亂離俱是夢。夕陽惟見水東流。

長安清明

早是傷春夢雨天。可堪芳草正芊芊。內官初賜清明



火上相閒分白打錢紫陌亂嘶紅叱撥綠楊高映畫  
秋千游人記得昇平事暗喜風光似昔年傷亂而作此故佳若

正序承平而爲是語則無味矣

### 過揚州

當年人未識兵戈處處青樓夜夜歌花發洞中春日  
永月明衣上好風多淮王去後無雞犬煬帝歸來葬  
綺羅二十四橋空寂寂綠楊摧折舊官河高駢呂用之妄專神

仙故借稱淮南而竇數兵火之後雞犬皆盡歸來字用招魂然葬字不穩貼疑本是喪字

### 漢州

北儂初到漢州城郭邑樓臺舉目驚松桂影中旌旆  
色芰荷風裏管弦聲人心不似經離亂時運還應卻  
太平十日醉眠金鴈驛臨岐無限臉波橫

### 綏州

雕陰無樹水南流。雉堞連雲古帝州。帶雨晚駝鳴遠  
戍。望鄉孤客倚高樓。明妃去日花應笑。蔡女歸時鬢  
已秋。一曲單于暮煙起。扶蘇城上月如鉤。

汧陽縣閣

汧水悠悠去似緋。遠山如畫翠眉橫。僧尋野渡歸吳  
岳。鴈帶斜陽入渭城。邊近不收蕃帳馬。地貧惟賣隴  
山鷄。牧童何處吹羌笛。一曲梅花出塞聲。

與東吳生相遇

十年身事各如萍。白首相逢淚滿纓。老去不知花有  
態。亂來惟覺酒多情。貧疑陋巷春偏少。貴想豪家月  
最明。且對一尊開笑口。未衰應見泰階平。

思歸

暖絲無力自悠揚。牽引春風斷客腸。外地見花終寂

冥異鄉聞樂更淒涼。紅垂野岸櫻還熟。綠染迴汀草  
又芳。舊里若爲歸去好。子期凋謝呂安亡。

七言今體詩鈔卷第六

珍  
做  
宋  
版  
印

七言今體詩鈔卷第七

楊仲猷二首

寒食中寄鄭起侍郎

清明時節出郊原，寂寂山城柳映門。  
水隔澹煙修竹寺，路經疏雨落花村。  
天寒酒薄難成醉，地迴樓高易斷魂。  
回首故山千里外，別離心緒向誰言。

贈譚先生

古觀重重遶翠微，杉松深處掩雙扉。  
雲生萬壑投龍去，海隔三山放鶴歸。  
花洞宴游春日永，石壇朝禮曙星稀。  
每聽高論長生理，擬向塵中便拂衣。

楊大年五首

漢武

蓬萊銀闕浪漫漫，弱水迴風欲到難。  
光照竹宮勞夜

拜露溥金掌費朝餐力通青海求龍種死諱文成食  
馬肝待詔先生齒編貝忍令索米向長安

書懷寄劉五

風波名路壯心殘三徑荒涼未得還病起東陽衣帶  
緩愁多騎省鬢毛斑五年書命塵西閣千古移文愧  
北山獨憶瓊林苦霜霰清尊歲宴強酡顏

世事悠悠未遽央虛名真意兩相忘休誇失馬曾歸  
塞未省牽牛解服箱四客高風驚楚漢五君新詠棄  
山王秋來尚有漁樵夢多在箕峯潁水傍

送客不及

宋詩紀事此  
乃劉子儀詩

青門祖帳曙煙微片席乘流鳥共飛曲岸馬嘶風嫋  
嫋短亭人散柳依依灞陵目斷猶迴望楚水魂銷爲  
送歸祇是河梁傳怨曲洛塵千古化征衣

劉校理屬疾

北窗風勁雪雲繁。移疾端居避世喧。載酒誰過楊子宅。張羅休署翟公門。多才最許飄飄氣。少別還銷黯黯魂。促爾衰衷憶真賞。遠天新月照黃昏。

劉子儀二首

直夜

雞人肅唱發章溝。漢殿重重虎戟稠。絳羽欲棲溫室樹。金波先上結璘樓。風來太液聞鳴鶴。霧卷明河見飲牛。萬國表章頻奏瑞。手披天語意如流。

柳絮

半減依依學轉蓬。斑駁無柰恣西東。平沙千里經春雪。廣陌三條盡日風。北斗城高連蠓蠓。甘泉樹密蔽青蔥。漢家舊院眠應足。豈覺黃金萬縷空。

甘泉賦浮蠓蠓而撒

天此用以狀絮之高  
大是迂晦楊劉體多此病

### 館中新蟬

庭中嘉樹發華滋，可要螳螂共此時。  
翼薄乍舒宮女鬢，蛻輕全解羽人尸。  
風來玉女烏先轉，露下金莖鶴未知。  
日永聲長兼夜思，肯容潘岳到秋悲。

第二句滯  
三四則

奇警  
矣

### 胡武平四首

#### 函谷關

天開函谷壯關中，萬古驚塵向此空。  
望氣竟能知老子，棄繻何不識終童。  
謾持白馬先生論，未抵鳴雞下客功。  
符命已歸如掌地，一丸曾誤隗王東。

貪使事則  
滯如此結

句是也其中  
二聯自工

#### 津亭



津亭歌闋戒棠舟。五兩風來不少留。西北浮雲連魏闕。東南初日照秦樓。層城渺渺人傷別。芳草萋萋客倦游。平樂舊歌收不得。更憑飛夢到瀛洲。

過桐廬

兩岸山花中有谿。山花紅白偏高低。靈源忽若乘槎到。仙洞還同採藥迷。二月辛夷猶未落。五更鴉舅最先啼。茶煙漁火遙堪畫。一片人家在水西。

古別

長道何年祖轍休。風帆不斷岳陽樓。佳人挾瑟漳河曉。壯士悲歌易水秋。九帳青油徒自貴。百壺芳醕豈消憂。至今長樂坡前水。不啻秦人怨隴頭。

林君復二首

孤山寺端上人房寫望

底處憑欄思渺然。孤山塔後閣西偏。陰沈畫軸林閒寺。零落棋枰葑上田。秋景有時飛獨鳥。夕陽無事起寒煙。遲留更愛吾廬近。祇待重來看雪天。

### 梅花

吟懷長恨負芳時。爲見梅花輒入詩。雪後園林纔半樹。水邊籬落忽橫枝。人憐紅豔多應俗。天與清香似有私。堪笑胡雛亦風味。解將聲調角中吹。

首不稱

三四誠爲妙句而通

### 宋公序一首

#### 寄子京

八年三郡駕朱輪。更忝鴻樞對國鈞。老去師丹多忘事。少來之武不如人。車中顧馬空能數。海上逢鷗想見親。惟有弟兄偕隱者。共將耕鑿報堯仁。

宋子京二首

真定述事

凡誇述所任地者必貶謫自解之詞子京知真定亦是降黜故其言如此

莫嫌屯壘是邊州。試聽山河說上游。帳下文書三幕

府。馬前鞞鼓五諸侯。王藩故社經除國。俠窟餘風解

報仇。四十年來民緩帶。使君何事不輕裘。知真定府當兼三局

知府一也安撫司二也馬步軍都總管三也此所謂三幕府所統六州鎮州爲本府餘磁相邢趙洺故曰

五諸侯其地趙王鎔之故國故曰王藩故社

落花

墜素翻紅各自傷。青樓煙雨忍相忘。將飛更作迴風舞。已落猶成半面妝。滄海客歸珠迸淚。章臺人去骨遺香。可能無意傳雙蝶。盡付芳心與蜜房。

文寬夫一首

秋風

獵徧蘭叢與桂枝。巢居未必有先期。靈臺十仞烏隨轉。阿閣三重鳳豈知。度柳暗催蟬嘒嘒。出雲高送鴈離離。漢宮玉樹知何限。爭忍重吟畫扇詩。

王介甫五首

葛谿驛

缺月昏昏漏未央。一燈明滅照秋牀。病身最覺風霜早。歸夢不知山水長。坐感歲時歌慷慨。起看天地色淒涼。鳴蟬更亂行人耳。正抱疏桐葉半黃。

送項判官

斷蘆洲渚落楓橋。渡口沙長過午潮。山鳥自呼泥滑滑。行人相對馬蕭蕭。十年長自青衿識。千里來非白壁招。握手祝君能強飯。華簪常得從雞翹。

河中使君修撰陸公挽詞

前旌一幅粉書名。行路知君亦涕零。遂失詞人空甫里。謾留悲鶴老華亭。主張壽祿無三甲。收拾文章有六丁。歸去仙龕終不遠。新墳東見海山青。

管輅傳背無三甲腹

無三壬此皆不壽之驗

### 葛興祖挽詞

憶隨諸彥附青雲。場屋聲名看出羣。孫寶寶暮年猶主簿。卜商今日更修文。山川凜凜平生氣。草木蕭蕭數尺墳。欲寫此哀終不盡。但令千載少知君。

荆公爲興祖誌墓故

爾云

### 悼王致處士

處士生涯水一瓢。行年七十更蕭條。老妻稻下分遺秉。弱子松閒拾墮樵。豈有聲名高後世。遂無饘粥永今朝。窮魂散漫知何處。甬水東西不可招。

王仲甫一首

西湖春日

爭得才如杜牧之。試來湖上輒題詩。春煙寺院敲茶鼓。夕照樓臺卓酒旗。濃吐雜芳熏蠹罅。溼飛雙翠破漣漪。人閒幸有蓑兼笠。且上漁舟作釣師。

七言今體詩鈔卷第七

七言今體詩鈔卷第八

蘇子瞻三十一首

題寶雞縣斯飛閣

西南歸路遠蕭條，倚檻魂飛不可招。  
野闕牛羊同鴈鷺，天長草樹接雲霄。  
昏昏水氣浮山麓，汎汎春風弄麥苗。  
誰使愛官輕去國，此身無計老漁樵。

宿九仙山

九仙謂左元放許邁王謝之流

風流王謝古仙真，一去空山五百春。  
玉室金堂餘漢士，桃花流水失秦人。  
困眠一榻香凝帳，夢遶千巖冷逼身。  
半夜老僧呼客起，雲峯缺處湧冰輪。

病中游祖塔院

紫李黃瓜村路香，烏紗白葛道衣涼。  
閉門野寺松陰轉，欹枕風軒客夢長。  
因病得閒殊不惡，安心是藥更

無方道人不惜階前水借與匏尊自在嘗

孤山二詠

自注孤山有陳時柏二株其一為人所薪僧志詮作堂其側曰柏堂與白

公居易竹閣相連屬余作二首

### 柏堂

道人手種幾生前鶴骨龍姿尚宛然雙榦一先神物  
化九朝三見太平年忽驚華構依巖出乞與佳名到  
處傳此柏未枯君記取灰心聊伴小乘禪

### 竹閣

海山兜率兩茫然古寺無人竹滿軒白鶴不留歸後  
語蒼龍猶是種時孫兩叢恰似蕭郎筆千畝空懷渭  
上村欲把新詩問遺像病維摩詰更無言

開運鹽河是日宿水陸寺寄北山僧清順

草沒河隄雨暗村寺藏修竹不知門拾薪煮藥憐僧



病掃地焚香淨客魂。農事未休侵小雪。佛燈初上報  
黃昏。年來漸識幽居味。思與高人對榻論。

秀州報本禪院鄉僧文長老方丈

萬里家山一夢中。吳音漸已變兒童。每逢蜀叟談終  
日。便覺蛾眉翠掃空。師已忘言真有道。我除搜句百  
無功。明年採藥天台去。更欲題詩滿浙東。

夜至永樂文長老院文時臥病退院

夜聞巴叟臥荒村。來打三更月下門。往事過年如昨  
日。此身未死得重論。老非懷土情相得。病不開堂道  
益尊。惟有孤棲舊時鶴。舉頭見客似長言。

過永樂文長老已卒

初驚鶴瘦不可識。旋覺雲歸無處尋。三過門閒老病  
死。一彈指頃去來今。存亡慣見渾無淚。鄉井難忘尚

有心欲向錢塘訪圓澤葛洪川畔待秋深

正月二十日與潘郭二生出郊尋春忽記去年是日同至女王城作詩乃和前韻

東風未肯入東門走馬還尋去歲村人似秋鴻來有信事如春夢了無痕江城白酒三杯醺野老蒼顏一笑温已約年年爲此會故人不用賦招魂

和子由澠池懷舊

人生到處知何似應似飛鴻踏雪泥泥上偶然留指爪鴻飛那復計東西老僧已死成新塔壞壁無由見舊題往日崎嶇還記否路長人困蹇驢嘶自注往日死馬于二

陵騎驢至澠池

壺中九華

自注湖口人李正臣蓄異石九峯玲瓏宛轉若窗櫺然予欲以百金買之

與仇池石爲偶方南遷未暇也名之曰壺中九華且以詩記之

我家岷蜀最高峯。夢裏猶驚翠掃空。五嶺莫愁千嶂外。九華今在一壺中。天池水落層層見。玉女窗明處處通。念我仇池太孤絕。百金歸買碧玲瓏。

送春

夢裏青春可得追。欲將詩句絆餘暉。酒闌病客惟思睡。蜜熟黃蜂亦懶飛。芍藥櫻桃俱掃地。鬢絲禪榻兩忘機。憑君借取法界觀。一洗人間萬事非。

詠史和劉道原

仲尼憂世接輿狂。臧穀雖殊竟兩忘。吳客漫陳豪士賦。桓侯初笑越人方。名高不朽終安用。日飲無何計亦良。獨掩陳編弔興廢。窗前山雨夜浪浪。

宋叔達家聽琵琶

數絃已品龍香撥。半面猶遮鳳尾槽。新曲翻從玉連

鎖舊聲終愛鬱輪袍。夢回只記歸舟字。賦罷雙垂紫  
錦條。何異烏孫送公主。碧天無際。鴈行高。

有美堂暴雨

游人腳底一聲雷。滿坐頑雲撥不開。天外黑風吹海  
立。浙東飛雨過江來。十分潑灑金尊凸。千杖敲鐺羯  
鼓催。喚起謫仙泉灑面。倒傾鮫室瀉瓊瑰。

次韻穆父尚書侍祠郊邱瞻望天光退而相慶  
引滿醉吟

千章杞梓蔭雲天。樗散誰收老鄭虔。喜氣到君浮白  
裏。豐年及我挂冠前。令嚴鐘鼓三更月。野宿貔貅萬  
竈煙。太息何人知帝力。歸來金帛看頰肩。

八月七月初入贛過惶恐灘

七千里外二毛人。十八灘頭一葉身。山憶喜懽勞遠

夢

自注蜀道有錯喜歡鋪在大散關上

地名惶恐泣孤臣長風送客添

帆腹積雨浮舟減石鱗便合與官充水手此生何止略知津

儋耳

霹靂收威暮雨開獨憑欄檻倚崔嵬垂天雌霓雲端下快意雄風海上來野老已歌豐歲語除書欲放逐臣回殘年飽飯東坡老一壑能專萬事灰

予以事繫御史臺獄獄吏稍見侵自度不能堪死獄中不能一別子由故作二詩授獄卒梁成以遺子由

聖主如天萬物春小臣愚暗自亡身百年未滿先償債十口無歸更累人是處青山可埋骨他年夜雨獨傷神與君世世爲兄弟又結來生未了因

柏臺霜氣夜淒淒。風動瓊瑤月向低。夢遶雲山心似

鹿。魂飛湯火命如雞。眼中犀角真吾子。身後牛衣愧

老妻。百歲神游定何處。桐鄉知葬浙江西。自注聞杭湖閩民為

余作解厄道揚者累月故末有此句

贈虔州術士謝晉臣

屬國新從海外歸。君平且莫下簾帷。前身恐是盧行

者。後學過呼韓退之。死後人傳戒定慧。生時宿直斗

牛箕。憑君為算行年看。便數生時到死時。

與秦太虛參寥會于松江而關彥長徐安中適

至分韻得風字

吳越谿山興未窮。又扶衰病過垂虹。浮天自古東南

水。送客今朝西北風。絕境自忘千里遠。勝游難復五

人同舟師不會。留連意擬看斜陽。萬頃紅

興述古自有美堂乘月夜歸

娟娟霜月稍侵軒。激激星河半隱山。魚鑰未收清夜永。鳳簫猶在翠微閒。淒風瑟縮經絃柱。香霧淒迷著髻鬟。共喜使君能鼓樂。萬人爭看火城還。

次韻述古過周長官夜飲

二更鏡鼓動諸鄰。百首新詩閒八珍。已遣亂鼃成兩部。更邀明月作三人。雲煙湖寺家家鏡。燈火沙河夜夜春。曷不勸公勤秉燭。老來光景似奔輪。

祭常山回小獵

青蓋前頭點皂旗。黃茅岡下出長圍。弄風驕馬跑空立。趁兔蒼鷹掠地飛。回望白雲生翠巘。歸來紅葉滿征衣。聖朝若用西涼簿。白羽猶能效一揮。

張子野年八十五尚聞買妾述古令作詩

錦里先生自笑狂，莫欺九尺鬢眉蒼。詩人老去鸞鷲，  
在公子歸來燕燕忙。柱下相君猶有齒，江南刺史已  
無腸。平生繆作安昌客，略遣彭宣到後堂。

朝雲詩

引不錄

不似楊枝別樂天，恰如通德伴伶元。阿奴絡秀不同  
老，天女維摩總解禪。經卷藥鑪新活計，舞衫歌扇舊  
因緣。丹成逐我三山去，不作巫山雲雨仙。

出潁口初見淮山是日至壽州

我行日夜向江海，楓葉蘆花秋興長。平淮忽迷天遠  
近，青山久與船低昂。壽州已見白石塔，短檝未轉黃  
茅岡。波平風軟望不到，故人久立煙蒼茫。

壽星院寒碧軒

清風蕭蕭搖窗扉，窗前修竹一尺圍。紛紛蒼雪落夏



簞冉冉綠霧沾人衣。日高山蟬抱葉響。人靜翠羽穿  
林飛。道人絕粒對寒碧。爲問鶴骨何緣肥。

黃魯直二十五首

題樊侯廟

門掩虛堂陰窈窈。風搖枯竹冷蕭蕭。邱墟餘意誰同  
問。豐沛英魂我欲招。野老無知惟卜歲。神巫何事苦  
吹簫。人歸田舍黃雲暮。只有哀蟬伴寂寥。

徐孺子祠堂

喬木幽人三畝宅。生芻一束向誰論。藤蘿得意干雲  
日。簫鼓何心進酒尊。白屋可能無孺子。黃堂不是欠

陳蕃。古人冷淡今人笑。湖水年年到舊痕。二首從古

蹟來而變其面貌。凡詠古詩。鑄事蹟。裁對工巧。此

西崑纖麗之體。若大家以自吐胸臆。兀傲縱橫。豈以

儷事爲尚哉。

紅蕉洞獨宿

南窗高臥獨逍遙。真感生來不易銷。枕落夢魂飛蛟  
蝶。燈殘風雨送芭蕉。永懷玉樹埋塵土。何異蒙鳩挂  
葦苕。衣笄妝臺蛛網結。可憐無以永今朝。

池口風雨留三日

孤城三日風吹雨。小市人家只菜蔬。水遠山長雙屬  
玉。身閒心苦一春鉏。翁從傍舍來收網。我適臨淵不  
羨魚。俯仰之間已陳迹。暮窗歸了讀殘書。

登快閣

癡兒了卻公家事。快閣東西倚晚晴。落木千山天遠  
大。澄江一道月分明。朱絃已爲佳人絕。青眼聊因美  
酒橫。萬里歸船弄長笛。此心吾與白鷗盟。

豪而有韻  
此能移太

白歌行於  
七律內者

夏日夢伯兄寄江南

故園相見略雍容。睡起南窗日射紅。詩酒一年談笑  
隔江山千里。夢魂通。河天月暈魚分子。柳葉風微鹿  
養茸幾度白沙青。影裏審聽嘶馬自搗筇。

贈清隱持正禪師

清隱開山有勝緣。南山松竹上參天。擗開華嶽三峯  
手。參得浮山九帶禪。水鳥風林成佛事。粥魚齋鼓到  
江船。異時折腳鐺安穩。更種平湖十頃蓮。

題息軒

僧開小檻籠沙界。鬱鬱參天翠竹叢。萬籟參差寫明  
月。一家寥落共清風。蒲團禪板無人付。茶鼎熏鑪與  
客同。萬水千山尋祖意。歸來笑殺舊時翁。

郭明府作西齋於穎尾請予賦詩

食貧自以官爲業。聞說西齋意凜然。萬卷藏書宜子  
第十年種木長風煙。未嘗終日不思穎。想見先生多  
好賢。安得雍容一尊酒。女郎臺下水如天。

題安福李令朝華亭

丹楹刻桷上崢嶸。表裏江山四望平。曉日成霞張錦  
綺。青林多露綴珠纓。人如旋磨觀羣蟻。田似圍棋據  
一枰。對案昏昏迷簿領。暫來登覽見高明。

送彭南陽

南陽令尹振華鑣。三月春風困柳條。攜手河梁愁欲  
別。離魂芳草不勝招。壺觴談笑平民訟。賓客風流醉  
舞腰。若見賢如武侯者。爲言來仕聖明朝。

結太淺直  
不爲佳江

西社中諸公多爲此等語所誤且武  
侯乃居襄陽之南陽里非南陽郡也

答龍門潘秀才見寄

男兒四十未全老，便入林泉真自豪。明月清風非俗物，輕裘肥馬謝兒曹。山中是處有黃菊，洛下誰家無白醪。想得秋來常日醉，伊川清淺石樓高。

寄黃幾復

我居北海君南海，寄鴈傳書謝不能。桃李春風一掃酒，江湖夜雨十年燈。持家但有四立壁，治病不蕪三折肱。想得讀書頭已白，隔谿猿哭瘴谿藤。

道中寄景珍兼簡庾元鎮

傳語濠州賢刺史，隔年詩債幾時還。因循尊俎疏相見，棄擲光陰只等閒。心在青雲故人處，身行紅雨亂花閒。遙知別後多狂醉，惱殺江南庾子山。

次韻奉寄子由

半世交親隨逝水，幾人圖畫入凌煙。春風春雨花經

眼江北江南水拍天。欲解銅章行問道。定知石友許忘年。鵲鴿各有思歸恨。日月相催雪滿顛。

和高仲本喜相見

雨昏南浦曾相對。雪滿荊州喜再逢。有子才如不羈馬。知君心是後凋松。閒尋書冊應多味。老傍人門想更慵。何日晴窗親筆硯。一椽相屬更從容。

和師厚郊居示里中諸君

籬邊黃菊關心事。窗外青山不世情。江橘千頭供歲計。秋蛙一部洗朝醒。歸鴻往燕競時節。宿草新墳多友生。身後功名空自重。眼前尊酒未宜輕。

次韻答柳通叟求田問舍之詩

少日心期轉繆悠。蛾眉見妒且障羞。但令有婦如康子。安用生兒似仲謀。橫笛牛羊歸晚徑。捲簾瓜芋熟

西疇功名可致猶回首何況功名不可求

次韻寅庵

大茗塘邊獨網魚小桃源口帶經鉏詩催孺子成雞  
柵茶約鄰翁掘芋區苦棟狂風寒徹骨黃梅細雨潤  
如酥此時睡到日三丈自起開關招酒徒

雲谿石

造物成形妙化工地形咫尺遠連空蛟鼉出沒二萬  
頃雲雨縱橫十二峯宴坐使人無俗氣閒來當暑起  
清風諸山落木蕭蕭夜醉夢江湖一葉中

次韻宋楸宗儗居甘泉坊雪後書懷

漢家太史宋公孫漫逐班行謁帝闈燕頰封侯空有  
相蛾眉傾國自難昏家移四壁書侵坐馬瘦三山葉  
擁門安得風帆隨雪水江南石上對窪尊

次韻宋楸宗三月十四日到西池都人盛觀翰  
林公出游

金狻繫馬晚鷺邊不比春江上水船人語車聲喧法  
曲花光樓影倒晴天人閒化鶴三千歲海上看羊十  
九年還作遨頭驚俗眼風流文物屬蘇仙

第二句略  
牽於韻不

能自  
在

次韻柳通叟寄王文通

故人昔有凌雲賦何意陸沈黃綬閒頭白眼花行作  
吏兒婚女嫁望還山心猶未死柅中物春不能朱鏡  
裏顏寄語諸公肯浦被割雞令得近鄉關

元明題哥羅驛竹枝詞

尺五攀天天慘顏鹽煙溪瘴鎖諸蠻平生夢亦未嘗  
處聞有鴉飛不到山風黑馬跪驢瘦嶺日黃人度鬼



門關黔南去此無多遠想在夕陽猿嘯聞

題落星寺

落星開士深結屋龍閣老翁來賦詩小雨藏山客坐  
久長江接天帆到遲宴寢清香與世隔畫圖妙絕無  
人知自注僧隆畫甚富而  
寒山拾得畫最妙蜂房各自開戶牖處處煮  
茶藤一枝此詩真所謂似  
不食煙火人語

陳履常四首

城南

白下官楊小弄黃騎臺南路綠無央含紅破白連連  
好度水吹香故故長躡滑踏青穿馬耳轉危緣險出  
羊腸熟知南社風流在預法排門有斷章

和寇十一晚登白門

重門傑觀屹相望表裏山河自一方小市張燈歸意

一珍做宋版印  
動輕衫當戶晚風涼孤臣白首逢新政游子青春見  
故鄉富貴本非吾輩事江湖安得便相忘

寄侍讀蘇尚書

六月西湖早得秋二年歸思與遲留一時賓客餘枚  
叟在處兒童說細侯經國向來須老手有懷何必在  
壺頭遙知丹地開黃卷解記清波沒白鷗

九日寄秦觀

疾風迴雨水明霞沙步叢祠欲暮鴉九日清尊欺白  
髮十年爲客負黃花登高懷遠心如在向老逢辰意  
有加淮海少年天下士獨能無地落烏紗

秦少游一首

中秋口號

一作雲口  
閣白語

雲山檐楯接低空公宴初開氣鬱蔥照海旌旛秋色

裏激天鼓吹月明中。香槽旋滴珠千顆。歌扇驚圍玉  
一叢。二十四橋人盡望。台星正在廣寒宮。

晁無咎一首

游華嶽歸道中望仙掌

深巖踏徧尋歸路。仙掌依然在碧虛。無限游人重駐  
馬。豈惟狂客倒騎驢。挂圖天漢朝霞上。落影秦關夕  
照餘。千古全生纔一土。可憐登覽盡邱墟。

希夷祠堂  
在觀中

晁景迂二首

都下追感往昔二首

少年使酒走京華。縱步曾游小小家。看舞霓裳羽衣  
曲。聽歌玉樹後庭花。門侵楊柳垂珠箔。窗對櫻桃卷  
碧紗。坐客半驚隨逝水。主人星散落天涯。

春風踏月過章華。青鳥雙邀阿母家。繫馬柳低當戶

葉迎人桃出隔牆花鬢深釵暖雲侵臉臂薄衫寒玉  
映紗莫作一生惆悵事鄰州不在海西涯

米元章一首

望海樓

雲開鐵甕近青天縹緲飛樓百尺連三峽江聲流筆  
底六朝帆影落尊前幾番畫角催紅日無事滄洲起  
白煙忽憶賞心何處是春風秋月兩茫然

劉景文一首

寄蘇內翰

倦壓鰲頭請左符笑尋潁尾爲西湖二二賢守去非  
遠六一清風今不孤四海共知霜鬢滿重陽曾插菊  
花無聚星堂上誰先到欲傍金尊倒玉壺

楊公濟一首

陪潤州裴如晦學士游金山回作

試上蓬萊第幾洲長雲漠漠鳥飛愁  
海山亂點當軒出江水中分遶檻流  
天遠樓臺橫北固夜深燈火見揚州  
迴船卻望金陵月獨倚牙旗坐浪頭

七言今體詩鈔卷第八



七言今體詩鈔卷第九

陸務觀八十七首

渡浮橋至南臺

客中多病廢登臨，聞說南臺試一尋。  
九軌徐行怒濤上，千艘橫繫大江心。  
寺樓鐘鼓催昏曉，墟落雲煙自古今。  
白髮未除豪氣在，醉吹橫笛坐榕陰。

晚泊

半世無歸似轉蓬，今年作夢到巴東。  
身游萬死一生地，路入千峯百嶂中。  
鄰舫有時來乞火，叢祠無處不祈風。  
晚潮又泊淮南岸，落日啼鴉戍堞空。

黃州

局促常悲類楚囚，遷流還歎學齊優。

此是自蜀東歸時在蜀爲幕僚

故有楚囚之歎，召問乃以詩上聞，非欲登用，故以齊優自比。

江聲不盡英雄恨，天

意無私草木秋萬里羈愁添白髮一帆寒日過黃州  
君看赤壁終陳迹生子何須似仲謀

閩中作

殘年作客徧天涯下馬長亭便似家三疊淒涼渭城  
曲數枝閒淡閩中花襞牋授筦相逢晚理鬢熏衣一  
笑譁俱是邯鄲枕中夢墜鞭不用憶京華

綿州魏成縣驛中有羅江東詩云芳草有情皆  
礙馬好雲無處不遮樓戲用其韻

老夫乘興忽西游遠跨秦吳萬里秋尊酒登臨遍山  
寺歌辭散落滿江樓孤城木葉蕭蕭下古驛灘聲瀟  
瀟流未許詩人誇此地茂林修竹憶吾州

倚樓

減盡朱顏白髮新高樓徙倚默傷神未酬馬上功名



願已是人閒老大身太史周南方臥疾拾遺劍外又  
逢春一栢且爲江山醉百萬呼盧迹已陳

登荔枝樓

放翁於乾道九年以唐安別駕  
暫攝嘉州故有喚作主人句

平羌江水接天流涼入簾櫳已似秋喚作主人元是  
客知非吾土強登樓閒憑曲檻常忘去欲下危梯更  
小留公事無多廚釀美此身不負負嘉州

州負  
此身

南定樓遇急雨

行遍梁州到益州今年又作度瀘游江山重複爭供  
眼風雨縱橫亂入樓人語朱離逢峒獠擢歌欵乃下  
吳舟天涯住穩歸心懶登覽茫然却卻愁

登賞心亭

蜀棧秦關歲月道今年乘興卻東游全家穩下黃牛

峽半醉來尋白鷺洲。黯黯江雲瓜步雨。蕭蕭木葉石  
城秋。孤臣老抱憂時意。欲請遷都淚已流。

月下自三橋汎湖歸三山

素壁初升禹廟東。天風爲我送孤篷。山橫玉海蒼茫  
外。人在冰壺縹緲中。茅舍燈青聞吠犬。蘋汀煙淡見  
驚鴻。白頭尚耐清寒在。安得終年伴釣翁。

成都大閱

千步毬場爽氣清。西山遙見碧嶙峋。令傳雪嶺蓬婆  
外。聲震秦川渭水濱。旗腳倚風時弄影。馬蹄經雨不  
霑塵。屬囊縛袴毋多恨。久矣儒冠誤此身。  
東坡祭常  
山回作不  
費氣力而自豪健  
放翁固猶遜之

山寺

籃輿送客過江村。小寺無人半掩門。古佛負牆塵漠

漢孤燈照殿兩昏昏喜投禪榻聊尋夢  
癩爲啼蟻更斷魂要識人閒盛衰理  
岸沙君看去年痕

自注峽漲時水高數

十丈至冬盡落

六月十四日宿東林寺

看盡江湖千萬峯不嫌雲夢芥吾胸  
戲招西塞山前月來聽東林寺裏鐘  
遠客豈知今再到老僧猶記昔相逢  
虛窗熟睡誰驚覺野碓無人夜自舂

最似東坡

游修覺寺

上盡蒼崖百級梯詩囊香椀手親攜  
山從飛鳥行邊出天向平蕪盡處低  
花落忽驚春事晚樓高剩覺客魂迷  
興闌掃榻僧房臥清夢還應到剡谿

自合江亭涉江至趙園

政爲梅花憶兩京海棠又滿錦官城  
鴉藏高柳陰初

密馬涉清江水未生風掠春衫驚小冷酒潮玉頰見  
微頰殘年飄泊無時了腸斷樓頭畫角聲

自芳華樓過瑤林莊

春晚江邊草過腰雨餘樓下水平橋名花未落如相  
待佳客能來不費招欄角峭風羅袖薄柳陰斜日玉  
驄驕此身醉死元關命敢笑聞鷄趁早朝

題繡川驛

繡川池閣記曾游落日欄邊特地愁白首卽今行萬  
里澹煙依舊送孤舟歸心久負鱸魚膾春色初回杜  
若洲會買一蓑來釣雨憑誰先爲謝沙鷗

將至京口

臥聽金山古寺鐘三巴昨夢已成空船頭坎坎回帆  
鼓旗尾舒舒下水風城角危樓晴靄碧林閒雙塔夕

陽紅銅瓶愁汲中濡水不見茶山九十翁

自注頃在京口嘗取

中濡水寄曾文清公

### 沂谿

射的峯前禹廟東。短篷三扇臥衰翁。閒攜清聖濁賢酒。重試朝南暮北風。水落痕留紅蓼節。雨來聲滿綠蒲叢。衝煙莫作匆匆去。擬看谿丁下釣筒。

### 早自烏龍廟歸

殘漏聲中聽曳鈴。翩翩吹帽出郊坰。雨過澗落雙虹白。雲合山餘一髮青。鐵馬蹴冰悲昨夢。朱顏辭鏡感積齡。歸來猶對空齋冷。鳥迹蒼苔自滿庭。

### 宴西樓

西樓遺迹尚豪雄。錦繡笙簫在半空。萬里因循成久客。一年容易又秋風。燭光低映珠簾麗。酒暈徐添玉

頰紅歸路迎涼更堪愛。摩訶池上月方中。

游山西村

莫笑農家臘酒渾。豐年留客足雞豚。山重水複疑無路。柳暗花明又一村。簫鼓追隨春社近。衣冠簡朴古風存。從今若許閒乘月。拄杖無時夜叩門。

冬夜汎舟有懷山南戎幕

釣船東去掠新塘。船在篷低露蕩香。十里澄波明白石。五更殘月伴清霜。飄飄楓葉無時下。嫋嫋菱歌盡意長。誰信梁州當日事。鐵衣寒枕綠沈槍。

出城

翩翩烏帽出林坳。掠面風微酒半醒。戍火難尋玉關夢。衣塵空愧草堂靈。天晴山雪明城郭。水漲江流近驛亭。客鬢不如隄上柳。數枝春動又青青。

西村

亂山深處小桃源往歲求漿憶叩門高柳簇橋初轉  
馬數家臨水自成村茂林風送幽禽語壞壁苔侵醉  
墨痕一首新詩記今夕細雲新月耿黃昏

題湖邊旗亭

春色初回杜若洲佳人又典鸕鶿裘八千里外狂漁  
父五百年前舊酒樓渡口遠山顰翠黛天邊新月挂  
瓊鉤回頭笑向紅塵說也有閒愁到此不

七十

七十殘年百念枯桑榆元不補東隅但存隱具金鴉  
觜那夢朝衣玉鹿盧身世蠶眠將作繭形容牛老已  
垂胡客來莫問先生處不釣娥江卽鏡湖

寒食

峽雲烘日已成霞。灑水生文淺見沙。又向蠻方作寒食。強持卮酒對梨花。身如巢燕年年客。心羨游僧處處家。賴有春風能領略。一生相伴遍天涯。

春日園中作

杏花開遍尚輕寒。盡日無人獨倚闌。久別名山憑夢到。每思舊友取書看。塵埃幸已賒腰折。富貴深知欠面團。老去逢春都有幾。一栢行復送春殘。

秋夜

秋氣侵帷夢不成。一燈西壁翳還明。風高露井無桐葉。雨集煙村有鴈聲。擊筑誰同燕市飲。賃春方作會稽行。從來自處知何等。堪歎江湖白髮生。

秋思

鴈陣橫空送早寒。白頭病叟住江干。風林脫葉山容



瘦霜稻登場野色寬萬里關河驚契闊一尊鄰曲話  
悲歡書生餓死尋常事那得重彈貢禹冠

新籬

新籬三面北通門藤架陰中細路分天雨淡青成卵  
色水波微皺作靴紋參差村舍穿林出縹緲漁歌隔  
浦聞忽覺楚鄉來眼底欲題幽句弔湘君

冬夜戲書

老樹經霜已盡紅縱橫落葉滿庭中一鉤淡淡西南  
月萬鼓馮馮東北風賒酒每慚添舊券讀書何計策  
新功倚窗坐睡摧積甚隔竹敲茶賴小童

初夏新晴

曲徑泥新晚照明小軒纔受一牀橫翩翩乳燕穿簾  
影蔌蔌新篁解籜聲藥物屏除知病減夢魂安穩覺

心平深居不恨無來客。時有山禽自贊名。

書憤

早歲那知世事艱。中原北望氣如山。樓船夜雪瓜洲渡。鐵馬秋風大散關。塞上長城空自許。鏡中衰鬢已先斑。出師一表真名世。千載誰堪伯仲間。

書感

常記當年賦子虛。公卿交口薦相如。豈知鶴髮殘年叟。猶讀蠅頭細字書。出處幸逃千載笑。功名從負此心初。荒園落葉紛如積。日暮歸來自荷鋤。

書事

北征談笑取關河。盟府何人策戰多。掃盡煙塵歸鐵馬。翦空荆棘出銅駝。史臣歷紀平戎策。壯士遙傳入塞歌。自笑書生無寸效。十年枉是枕琯戈。

枕上作

蕭蕭白髮臥扁舟。死盡中朝舊輩流。萬里關河孤枕夢。五更風雨四山秋。鄭虔自笑窮耽酒。李廣何妨老不侯。猶有少年風味在。吳牋著句寫清愁。

枕上作

一室幽幽夢不成。高城傳漏過三更。孤燈無燄穴鼠出。枯葉有聲鄰犬行。壯日自期如孟博。殘年但欲慕初平。不然短楫棄家去。萬頃松江看月明。

臥病書懷

袞袞年光挽不留。卽今已白五分頭。病中對酒猶思醉。夢裏逢人亦說愁。青海戰雲臨賊壘。黑山飛雪灑貂裘。丈夫有志終難料。憔悴漁村死卽休。

病起小飲

病起新霜滿鬢蓬。憑高一笑與誰同。酒如綠淨春江  
水。人有鴻荒太古風。野寺鐘來夕陽外。寒山峯插亂  
雲中。一官政爾妨人樂。只合滄浪狎釣翁。

醉中戲作

當年買酒醉新豐。豪士相期意氣中。插羽軍書立談  
辨。如山鐵騎一麾空。玉關久付清宵夢。笠澤今成白  
首翁。堪笑燈前如意舞。尚將老健壓諸公。

安流亭俟客不至獨坐成詠

憶昔西征鬢未霜。拾遺陳迹弔微茫。蜀江春水千帆  
落。禹廟空山百草香。馬影斜陽經劍閣。鵝聲清曉下  
瞿唐。酒徒雲散無消息。水榭憑闌淚數行。

通首皆取  
用杜集

夢至成都悵然有作

宦途元不羨飛騰。錦里豪華壓五陵。紅袖引行游玉

局華燈圍坐醉金繩階前汗血洮河馬架上霜毛海  
國鷹世事轉頭誰料得一官南去冷如冰

秋夜思南鄭軍中

五丈原頭刁斗聲秋風又到亞夫營昔如埋劍常思  
出今作閒雲不計程盛事何由觀北伐後人誰可繼  
西平眼昏不禁陳編得挑盡殘燈不肯明

懷南鄭舊游

南山南畔昔從戎賓主相期意氣中渴驥奔時書滿  
壁餓鴟鳴處箭凌風千艘粟漕魚關北一點烽傳駱  
谷東惆悵壯遊成昨夢戴公亭下伴漁翁

得季長書追懷南鄭幕府悵然有作

從戎昔在山南日強半春光醉裏銷綠樹啼鶯窺帽  
影畫橋飛絮送鞭梢花經小雨開差晚笙怯餘寒瀟

未調惆悵流年又如許。羈魂欲仗楚詞招。

雪夜感書

江月亭前樺燭香。龍門閣上馱聲長。亂山古驛經三  
折。小市孤城宿兩當。晚歲猶思事鞍馬。當時那信老  
耕桑。綠沈金鎖俱塵委。雪灑寒燈淚數行。

病中簡仲彌性唐克明蘇訓直

移疾還家暫曲肱。依然耐久北牕燈。心如澤國春歸  
雁。身似雲堂日過僧。細雨佩壺尋廢寺。夕陽下馬弔  
荒陵。小留莫厭時追逐。勝社年來冷欲冰。

自注三君皆有歸志

云故

因王給事回使奉寄

雨昏郡郭連三日。吏報江流忽數回。

自注江每漲津吏輒報或三四

至正歎船如天上坐。那知人自日邊來。臂弓腰箭身

今老航海梯山運已開漢虜不應常自守期公決策  
畫雲臺

陳阜卿先生爲兩浙轉運司考試官時秦丞相  
之孫以右文殿修撰來就試直欲首選阜卿得  
予文卷擢置第一秦氏大怒予明年旣顯黜先  
生亦幾陷危機會秦公薨遂已予晚歲料理故  
書得先生手帖追感平昔作長句以識其事不  
知衰涕之集也

冀北當年浩莫分斯人一顧每空羣國家科第與風  
漢天下英雄惟使君後進何人知大老橫流無地寄  
斯文自憐衰鈍辜真賞猶竊虛名海內聞

雨泊趙屯有感

歸燕羈鴻共斷魂  
荻花楓葉泊孤村  
風吹暗浪重添

纜雨送新寒半掩門魚市人煙橫慘淡龍祠簫鼓鬧  
黃昏此身且健無餘恨行路雖難莫更論

歸次漢中境上

雲棧屏山閱月遊馬蹄初喜踟梁州地連秦雍川原  
壯水下荆揚日夜流遺虜孱孱甯遠略孤臣耿耿獨  
私憂良時恐作他年恨大散關頭又一秋

赴成都泛舟自三泉至益昌謀以明年下三峽

詩酒清狂二十年又摩病眼看西川心如老驥常千  
里身似春蠶已再眠暮雪烏奴停醉帽秋風白帝放  
歸船飄零自是關天命錯被人呼作地仙放翁紹興  
未自赦令

所罷歸孝宗即位起之乾道二年又自洪州通判罷  
歸故云再眠此時正通判夔州任滿故有放歸船句  
然未行會王炎宣撫川陝辟爲幕僚  
自此在蜀又六七年乃下峽東歸

留題雲門草堂



小住初爲旬月期。二年留滯未應非。尋碑野寺雲生屨。送客溪橋雪滿衣。親滌硯池餘墨漬。臥看爐面散煙霏。他年游宦應無此。早買漁蓑未老歸。

雪晴行益昌道中頗有春意

杜陵雁下歲將殘。匹馬西游雪擁關。顛顛敢忘雙闕路。淹遲徧看兩川山。春回柳眼梅須裏。愁在鞭絲帽影閒。安得黃金成大藥。爲人千載駐顏顏。

舟行蘄黃閒雨霽得便風有感

天清雲白十分晴。帆飽舟輕盡日行。江底魚龍貪晝睡。淮南草木借秋聲。好山縹緲何由住。華髮蕭條只自驚。莫怪時人笑疎懶。宦情元不似詩情。

結句湊

寓驛舍

自注予三至成都皆館于是

閒坊古驛掩朱扉。又憩空堂綻客衣。九萬里中鯤自

化一千年外鶴仍歸。繞庭數竹饒新筍。解帶量松長  
舊圍。唯有壁閒詩句在。暗塵殘墨兩依依。

秋晚登城北門

幅巾藜杖北城頭。卷地西風滿眼愁。一點烽傳散關  
信。兩行雁帶杜陵秋。山河興廢供搔首。身世安危入  
倚樓。橫槊賦詩非復昔。夢魂猶繞古梁州。

獵罷夜飲示獨孤生

白袍如雪寶刀橫。醉上銀鞍身更輕。帖草角鷹掀兔  
窟。憑風羽箭作鴟鳴。關河可使成南北。豪傑誰堪共  
死生。欲疏萬言投魏闕。燈前攬筆涕先傾。

夜半千峯樹

夷甫諸人骨作塵。至今黃屋尚東巡。度兵大岘非無  
策。收泣新亭要有人。薄醜不澆胸壘塊。壯圖空負膽

輪囷危樓插斗山，銜月徙倚長歌一愴神。

夜泊水村

腰間羽箭久凋零，太息燕然未勒銘。老子猶堪絕大漠，諸君何至泣新亭。一身報國有萬死，雙鬢向人無再青。記取江湖船泊處，臥聞新雁落寒汀。

小舟過御園

聖主憂民罷露臺，春風別苑晝常開。盡除曼衍魚龍戲，不禁芻蕘雉兔來。水鳥避人橫翠靄，宮花經雨委蒼苔。殘年自喜身強健，又作清都夢一回。

曳策

自注游房園作

慈竹蕭森拱廢臺，醉歸曳策一徘徊。紛紛落日牛羊下，黯黯長空霰雪來。三峽猿催清淚落，兩京梅傍戰場開。客懷已是淒涼甚，更聽城頭畫角哀。

初夏閒居

川雲漠漠雨冥冥。濁酒閒傾不滿瓶。蠶簇尚寒憂繭薄。稻陂初滿喜秧青。王師護塞方屯甲。親詔憂民已放丁。病起自憐猶健在。不須求應少微星。

夜坐小飲

零落槐花已滿溝。江湖又見一番秋。冰輪有轍凌空上。銀漢無聲接地流。丹荔甘寒勞遠致。玉醅醇冽喜新筵。移牀坐對西南電。好雨心知不待求。

江樓醉中作

淋漓百榼宴江樓。秉燭揮毫氣尚遒。天上但聞星主酒。人間寧有地埋憂。生希李廣名飛將。死慕劉伶贈醉侯。戲語佳人頻一笑。錦城已是六年留。

自注退之詩云越女

一笑三年留鼎按前聯用孔北海天垂酒星之耀仲長統寄愁天上埋憂地下並漢人語相稱後聯用唐

人詩若使劉伶爲酒帝亦須封我醉鄉侯  
取材較狠對上句不過且于本意亦乖

### 月下醉題

黃鵠飛鳴未免飢此身自笑欲何之  
閉門種菜英雄老彈鋏思魚富貴遲  
生擬入山隨李廣死當穿冢近  
要離一尊強醉南樓月感槩長吟恐過悲

生死一聯更勝前首

上一聯則遜前首

### 芳華樓夜宴

射虎將軍老不侯尚能豪縱醉江樓  
笙歌雜沓娛清夜風露高寒接素秋  
少日壯心輕玉塞暮年幽夢墮  
滄洲人閱清絕沅湘路當笑靈均作許愁

### 醉中感懷

早歲君王記姓名只今顛顛客邊城  
青衫猶是鷓鴣行舊白髮新從劍外生  
古戍旌旗秋慘澹高城刁斗夜

分明壯心未許全消盡。醉聽檀槽出塞聲。

春遊

春風隄上草萋萋。草軟沙平護馬蹄。似蓋微雲纔障日。如絲小雨不成泥。千秋觀裏逢新燕。九里山前聽午雞。追憶舊遊愁滿眼。綵船曾繫畫橋西。

結句蓋憶其去婦如

沈國絕句之意

南窗睡起

夢中忘卻在天涯。一似當年錦里時。狂倚寶笙歌白紵。醉移紅燭寫烏絲。酒來郫縣香初壓。花送彭州露尚滋。起坐南窗成絕歎。玉樓乾鵲誤歸期。

七月七日夜坐舍北水涯戲作

兀傲胡牀酒半醒。釣筒收盡數舟橫。風生細葛無三伏。月上疎林正四更。北斗離離低欲盡。明河脈脈去

無復聲斥僊豈復塵中戀便擬騎鯨返玉京

晚晴聞角有感

暑雨初收白帝城小荷新竹夕陽明十年塵土青衫色萬里江山畫角聲零落親朋勞遠夢淒涼鄉社負歸耕議郎博士多新奏誰致當時魯二生

萬里橋江上習射

坡隴如濤東北傾胡牀看射及春晴風和漸減雕弓力野迴遙聞羽箭聲天上櫓槍端可落草中狐兔不須驚丈夫未死誰能料一筇他年下百城

感憤

今皇神武是周宣誰賦南征北伐篇四海一家天歷數兩河百郡宋山川諸公尚守和親策志士虛捐少壯年京洛雪消春又動永昌陵上草芊芊

書憤

鏡裏流年兩鬢殘。寸心自許尚如丹。衰遲罷試戎衣窄。悲憤猶爭寶劍寒。遠戍十年臨的博。壯圖萬里戰皋蘭。關河自古無窮事。誰料于今袖手看。

後寓歎

貂蟬未必出兜鍪。要是蒼鷹憶下鞦。彭澤徑歸端爲酒。輕車已老豈須侯。千年精衛心平海。三日於菟氣食牛。會與高人期物外。摩挲銅狄瀟城秋。

新夏感事

百花過盡綠陰成。漠漠鑪煙睡晚晴。病起兼旬疎把酒。山深四月始聞鶯。近聞下詔通言路。已卜餘年見太平。聖主不忘初政美。小儒惟有涕縱橫。

直舍獨坐思成都



錦城花絮送吳船。屈指東歸又幾年。羣玉峯頭春老矣。百花潭上夢依然。青衫尚記稱狂客。白髮甯知作老仙。所恨酒腸非復昔。閒游空負杖頭錢。

野興

掃盡紅塵閉是非。舍傍好在舊苔磯。壺中春色松肪酒。江上秋風木葉衣。一片共知雲偶出。千年誰識鶴重歸。勿言野外無供給。雪後連山藥草肥。

郊行

淒風吹雨過江城。緩策羸驂並水行。古路初驚秋葉墮。荒郊已放候蟲鳴。壯心耿耿人誰識。往事悠悠恨未平。斜日半竿羌笛怨。西陵寂寞又潮生。

聞猿

瘦盡腰圍不爲詩。良辰流落自成衰。也知客裏徧多

苦遭前政墮危機二十餘年詠式微天上謫仙皆欲  
殺海濱大老竟來歸故園松竹猶存否舊日人民果  
是非最小郎君今弱冠別時聞道不勝衣

自注謂孫  
壻文授薰

按李孟傳字文授光  
南遷時孟傳才六歲

### 食筍

花事闌珊竹事初一番風味殿春蔬龍蛇戢戢風雷  
後虎豹班班霧雨餘但使此君常有子不憂每食歎  
無魚丁甯下番須留取障日遮風卻要渠

絕似  
涪翁

### 楊廷秀一首

### 送邱宗卿帥蜀

諭蜀宣威百萬兵不須號令自精明酒揮勃律天西  
柝鼓臥蓬婆雪外城二月海棠傾國色五更杜宇說  
鄉情少陵山谷千年恨不遇邱遲眼爲青

終